

修訂日期: 2004/10/12 發行日期: 2006/2/15

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 17, No. 773

原始資料: 蕭鎮國大德提供, 維習安大德提供之高麗藏 CD 經文, 北美某大德提供

## No. 773

### 佛說菩薩修行四法經

大唐天竺三藏地婆訶羅譯

如是我聞。一時佛在舍衛國祇樹給孤獨園。與大比丘眾千二百五十人俱。爾時世尊告諸比丘。汝等已得無量善利。當求無上佛大菩提。何以故。佛菩提者。世出世間無等等故。若未來世諸眾生等。發意欲求佛菩提者。當修四法。何等為四。一者當發大菩提心。寧失身命不應退轉。二者應當親近善友。寧失身命不應遠離。三者應修忍辱柔和。寧失身命不生瞋恚。四者當依寂靜之處。寧失身命不思憤鬧。諸善男子。如是四法。菩薩摩訶薩應當修學。爾時世尊。即說偈言。

諸欲求勝果	當發菩提心
策勤精進行	須依善知識
忍辱佛所讚	稱為有力人
空閑聖所居	無畏猶師子

爾時世尊說此偈已。復作是言。諸有智慧大慈悲者。能修如上四種之法。其人則能解脫生死出離魔網。成等正覺得大涅槃。爾時世尊說此經已。彼諸比丘及諸菩薩。聞佛所說皆大歡喜。信受奉行作禮而去。

### 佛說菩薩修行四法經